

عمار مطاوع يكتب : هل محرر اليوم السابع ضابط آمن ؟



الاثنين 23 يونيو 2014 12:06 م

نافذة مصر : بقلم عمار مطاوع

مشكلة موقع اليوم السابع إنه ما يفكرش يعمل سيرش عن اسم الشخص اللي هيكلفه يضرب خبر معين قبل ما ينزل اسمه مع الخبر!

يعني مثلا الخبر اللي ع اليمين ده هما منزلينه الصبح بإنه الأمن تمكن من ضبط خلية كانت بتأجر شقق للإخوان في اعتصام رابعة النص ساعة بـ 500 جنيه

طبعاً بغض النظر عن إن 500 جنيه كل نصف ساعة يعني 12000 جنيه فى اليوم يعنى 480000 شهرياً يعني لو أجرت 100 شقة في 24 شهر كانت عملت مليار و152 مليون جنيه وحلت مشكلة عجز الموازنة للدولة

لكن الأهم من دا كله إن اسم المحرر اللي نازل مع الخبر لو عملت سيرش عليه في الموقع هتلاقي كل أخباره من نفس النوع حتي من أيام حكم مرسي .. وآخر مقال كتبه كان بيتكلم فيه عن فيلم حلاوة روح وحاطط صورة إباحية لهيفاء وهبي في صدر المقال رغم إنه المفروض في المقال بيعترض ع الفيلم عشان يأيد قرار الحكومة بمنعه وكده يعني

نفس الشخص هتلاقي الموقع منزل خبر عن زواجه ومكتوب إن اللي حضر فرحه كلهم ضباط في الداخلية (أصحابه يعني) واللواء فلان الفلاني والعديد من (قيادات) الداخلية .. الوزير بنفسه كمان حضر!

حضرتك إنت متأكد إنه صحفي؟

